



和
2416
1-3

南岳集序

鄒孟氏有言曰知譬則巧聖譬則力其至爾力也其中非爾力也此以造道言夫文豈異乎是古稱文章爲不朽盛事然是猶藝之精者必有獨得之才邁往之氣然後方可與論於家數之淺深不者雖榮華其言藻繪其色祇爲弊帚之自珍黃屋之僭擬而已曷足貴哉南岳趙先生自其先休川公以文章鳴緒脉有從來生稟穎異之資未齷讀古文過眼成誦勝冠已有盛名顧早嬰痼病泮淹床第者踰十年未克肆力於鉛槧以充其分量然論其所就猶足以追步古



作者一時操觚士莫或之先既以詞賦擢解元對策
屢入高等坐數竒晚成一第而又齟齬窮局於掌制
登瀛不與文苑諸公狎主夏盟豈不惜哉竊嘗論之
先生之文粹然出自經史取材於韓蘇析理於閩洛
平淡之中自有波瀾藻采真所謂經世之文也其功
令應舉稍變爲鈎棘非其所自喜不可以此爲累詩
不主一格少作尚竒韻晚入神解超然於色相之表
是豈區區繩尺影響所可髣像者歟世之譚者論前
輩文章以爲谿谷得法品澤堂得妙品吾祖遲川得
神品近世金相公斯百亦嘗言李葵仲當法品趙駿

叔當神品而金公自居妙品前後標題未知軒輊如
何而息庵並世齊驅矚焉讓與一頭則先生之於文
奔軼絕塵此可知已由此觀之揚子所謂巧者不過
習者之門亦偏辭耳先生所著述多棄稿不收存者
若干卷長胤承旨君屬余抄定未及梓行承旨君沒
其季進士儀祥與其姪鎮禧謀以活字先印詩文數
卷而徵序引於錫鼎念先生父友也又嘗辱承指畫
今已荒落矣其於劄劂氏無能爲役而亦何可無一
言錫鼎曾銘其墓誌道先生之文詳矣其才猷識見
實在於良齋新筭後之人觀全稿及附錄庶幾有以

識其所存

歲在上章滍灘日南至完山崔錫鼎序

南岳集卷一

五言絕句

自嘲 丙午

文章真富貴經學大功名誰信茅茨裏剩留不世榮

青鶴洞漫詠 壬子

泱泱泉春石嘈嘈風撼松幽人不成夢坐數五更鍾

醉題公子舉卿扇面 癸丑

濁世佳公子清時良大夫相逢落花節大醉古城隅
臨瀛之北有石臨海翼然若飛鳳之形其頂可
坐數十人銀濤萬里極目無礙蓋絕境也俗號



牛巖名甚不與余改之曰飛鳳臺題詩其上丙辰

東海最奇處莫如飛鳳臺銀濤日春撞羽客來徘徊

醉題峴山東軒丙辰

落花紅點點流水碧粼粼使君無一事長醉大堤春

贈錦城妓丁巳

一曲瑤琴怨千年故國歌秋風錦城館明月奈爾何

贈長城琴妓秋香女孫丁巳

我來訪香娘人亡琴亦亡唯有女孫在白頭傳芬芳

夢題人扇面戊午

何處相逢處長安細雨天殘花點芳草深樹鎖輕烟

贈尹養一敬教赴鏡城己未

鞞鞞最深處君為通判去去去去搥君恩猶得居官署

送姜叔夏碩昌赴鐘城庚申

故人向愁州愁州連大漠何似草原時只得鬢邊玉

生日酬贈崔汝和錫鼎號明谷 韓魯瞻 恭東 丑七

余初度之辰兩學士為枉弊廬盛有所詠以侈

鄙夫而久病中不能和却以五言絕謝厚意

慙慙兩學士為賀弊孤辰却憶城南會回頭暗損神

在青鶴洞時值初度周卿光甫來會今亡故云

次韻

明谷

青蓮降生日毓秀應星辰岳老千年後詩成也
泣神

次韻

曾瞻

才子趨庭日文星降曜辰清新五字句披讀覺
精神

七言絕句六十八首

漁父 戊戌

曉色蒼茫水氣寒漸看輕霧繞江干漁翁收網烟波
底辛苦擘舟上淺灘

睡起戲贈崔周卿後尚 戊申

故人珂馬赴城上日暮歸來泥沒靴何似草堂新睡
罷臥聽疎雨打秋荷

送洪文錫箕赴靈光 巳酉

法浦秋生五馬催海鷗猶識舊漕臺應恠當年衣繡
客白頭今日佩符來

夜聞溪瀑有感 壬子

夢寐何曾到事功筭來浮念揔成空終宵浙瀝窻前
瀑滌盡平生磊砢胸

題 康陵齋壁 癸丑

雜樹陰陰恠鳥譁閉門終日似蘭閣寢郎宴坐無餘

事時喚齋奴掃落花

世子宮廷祥詩 甲寅

慶善堂前討古文 胄筵重設講劇勤
微臣勸導容何力 睿學高明已十分

新嘗菜羹戲題

素綠初萌薺葉開 青魚新自海州來
糝羹發越調三味 不羨侯家煮豹胎

題天安客舍 乙卯

征輶冉冉到天安 欲寫羈愁倚畫欄
莊柳村花無意緒 獨憐階竹傲春寒

又戲題

冠蓋紛紛官吏愁 主人倦色在眉頭
極知牽挽非真意 爲愛華軒且少留

將赴襄陽出宿東郭與內弟吳貫之道一 號西

坡燒燭對坐詠懷

離懷擾擾似懸旒 殘月依依又滿樓
回首峴山千里路 使君行色揔堪愁

洛山觀日出

宿醉昏昏睡正濃 晨光侵戶尚瞳矓
居僧蹴我看朝日 銀海蒼茫萬里紅

洛寺醉題

白浪翻天風撼山佛燈明處寺僧閑門前滄海庭前
月獨占竒觀天地間

蟻戰

丙辰以下三首課製居首

床下誰將牛鬪聞槐陰春日蟻成羣道人靜坐看蠻
觸擾擾俄驚覆九軍

葡萄架

細擺繁莖小架成高張密葉午陰清休論療渴舍風
味箇箇磨垂碧水晶

石榴盆

樹抄離離揭絳紗盆中灼灼繞紅霞茜裾太赤猩衫
淺長使佳人妬此花

戲題

老年詩律漸覺難自歎詞源已枯乾雖然喜作天機
語留與千秋具眼看

偶出行春自靈穴寺抵林泉李續元家賞牡丹
題一絕

百朵姚黃爛紫霞峴山西畔日初斜使君不向習池
去來醉林泉豪士家

戲題東軒壁上

屋後飛花紅點點溪邊芳草碧萋萋自是官居勝仙界使君那不醉如泥

大堤素稱多妙舞清歌余蒞茲土暇日徵按則信然有五娘者以善謳聞少時爲東淮都尉所眄贈扇面兩絕澤老潛谷白軒諸公繼而和之余招見五娘年已六旬髮齒墮落使之歌尚有嫋嫋舊音掩抑宛轉似有慨惋少日之意家甚貧只有二女曰楚雲采雲俱繼家聲而采雲尤善新聲能作阿母錢樹子矣前數公余所敬慕者筆蹟宛然古人不可作而五娘又老矣撫卷

悲感仍次卷中韻贈之

清歌一曲大堤邊詩卷當年作募緣惆悵佳人今已老那堪擁髻更悽然

次清澗亭板上韻

白浪千層舟泛泛青天萬里鳥雙雙樓頭宿客寒無夢坐待紅曦曉倚窗

洛寺宴席吟呈李弼卿翊相

號梅澗尹養一

碧海無波明月高歌聲嫋嫋笛聲豪使君誰道風流薄十隊紅粧擁錦袍

白香山守杭州時元微之在越州白遶歌者商

玲瓏於越州往返時輒有贈詩爲詩話中好事
余送采雲於尹使君養一養一曾有書以勿爲
愛惜戲余余亦以一絕戲贈雲仍令轉呈使君
一曲離歌曉月寒佳人此去幾時還使君陶寫無他
物早使函關趙璧完

酒席戲贈養一

梨花亭下海揚波一曲清歌月已斜今夜大堤行樂
處風流誰屬一枝花

妓名一花

洛山酒席憶擇之仍寄示

半夜清歌響欲低陟州雲樹望中迷梨花亭上今宵

月應自分輝照竹西

留題峴山客舍

海上分符僅二年使君雙鬢已蕭然北風斜日西歸
路嶺雪參差照碧天

留別峴山諸生

政拙心勞已自知媿無治績補毫絲憧憧一念難忘
處只在諸生進學時

峴山素稱有歌無絃甚是烟花缺事皆言習俗
已然雖勸無成余慨然有改絃之意廣鳩琴材
遠延琴師選兒妓五六人方欲教之而適解歸

未果分授琴張於兒妓而去其中一琴卽臨瀛
良工所斲制極精妙余甚寶惜留與兒妓之最
佳者妓年今方十歲矣或有譏余琴是風物不
妨持去而強留沽名者此不知余意余之留此
蓋欲遂余初志後賢倘能識余苦心繼此勸教
致令家家絃管則豈唯助琴堂閑趣而已庶可
增大堤風流云爾

辛勤爲斲嶧陽桐絃上泠泠太古風留與大堤兒妓
去彈時能復憶衰翁

乙卯秋赴襄州路過黃庭戲次壁間韻丙辰冬

承 召上京壁題宛然深慨吾生行止之靡定
而別有所感者重次其韻以志之且去時憂其
路險有不樂之意來時不無係戀不忘之心佛
氏不欲三宿桑下者良以此也亦可一笑
浮生行止似雲烟却望襄州更愴然今向紅塵倘失
脚此身那直一文錢

寄聰師丁巳

老子新從滄海歸慙爲寄舊題詩洛山東畔銀濤
潤恨不邀師共看之

看花有感

南岳集卷一
杏花欲落桃花發從此千花次第開萬事皆如花有序當場何必苦相催

余性愛菊乙卯秋栽菊滿園擬趁九秋一泛觴
其年八月出宰峴山居暮年每思故園菊花丙
辰冬解歸丁巳秋又栽菊甚盛八月復以京試
官作湖左之役又不見此花之開此身勞碌亦
堪一嘆云爾

今年八月又辭家每到花時不見花南下湖南九百里秋光的的繞征車

楚山館滯雨戲次板上韻

朝別金城情黯黯暮投山館雨浪浪愁人自有關心事楚峽蒼蒼秋夜長

錦城途中

官門草市早開場滿市村民著蔽陽稻酒如油魚鮓賤歸來扶醉唱漁郎

完山客舍有文谷金相公壽恒詩辛丑年奉

孝廟實錄徃藏茂朱時過路所詠也今聞顯

廟實錄匪久當到此府云自辛丑距今未滿二十歲而連有此役則以兩先王盛德崑烈俱未享堯舜之壽嗚呼痛哉謹次其韻以寓微臣

感愴之懷云爾

孝廟賓天廿載間 崇陵實錄又名山堯年舜壽天
終嗇空使微臣涕暗潛

靈巖訪文谷謫居吟呈一絕

湘浦驚鴻叫晚秋 九歌歌罷不勝愁 誰憐月出山頭
月夜夜清光照玉樓

次韻

趙學士詞伯枉過鵬舍辱惠佳什感佩之至依
韻奉謝

嘉橘幽蘭楚國秋 繡衣珍重問窮愁 殘星長笛

催詩興倚遍江南幾處樓

西湖 靈巖

西湖樂事儘無窮 萬戶俱開花竹中 稻黍連雲魚鱉
賤逢人無不說年豐

南平映翠樓次鄭畸翁咏蓮韻

千柄青荷滿綠塘 一間華屋置中央 江南九月清霜
晚風便時聞冉冉香

酬汝和貫之 二首 戊午

清時豈敢歎棲遑 只是風塵萬事忙 惟有青山最深
處歸歟端合理吾裝

南齊集卷一
初如井陘開門戰却似滎陽卷入城莫是劉鄩生妙
計閉營三日寂無聲

次韻

西坡

看君落筆真勁敵笑我殘兵苦守城自是兵家
奇正在不關低首帽威聲

次韻

明谷

漢代條侯堅守壁秦時王翦善攻城兵家不必
論攻守制勝唯看實與聲

呈北汀洪尚書處亮

公留京洛養沉疴我向江湖理小窩春盡北汀花鳥

晚想應清夜夢烟波

梨峴途中漫吟

宣仁門外漫天柳梨峴宮前撲地花詩翁醉後狂歌
裏不覺青春白日斜

鄭殿中吳貫之報章沓至戲次其韻

瑕猶難攻况望堅詩壘相持坐閱年四面紛紛皆受
敵只愁老眼眩多拳

次韻

西坡

學道初心晚益堅沉潛墳典欲窮年縱然吟嘒
資消遣無意騷壇角老拳

戲示崔汝和吳貫之催和章二首

南宮玉署摠遑遑視草行香日日忙獨我宦情輕似
葉纔辭宗正理歸裝
兩君詩思下灘船老子詞源已竭泉恐是宦情能敗
意故於衰朽讓先鞭

次韻

明谷

殷書咄咄孔遑遑凡聖千秋只管忙差喜詩翁
宦情薄廣陵春水促歸裝
歸夢前宵月滿船起來高詠撫龍泉淹留總爲
君恩重不是江湖懶著鞭

夜坐偶吟

坐到西峰月隱時滿庭松影黑參差道人此夜心中
事擾擾塵襟那得知

戲題

文喜東坡詩樂天呻吟聊可送殘年平生西漢黃初
意回看初心更赧然

病中偶觀白集篇中徃徃說閑退之樂極口津
津令人不覺企豔此東坡之所以終身慕之而
不得者也蓋坡翁與香山杭州以前出處偶相
似其後則苦樂天淵然觀兩老行事無非自取

南岳集卷一
者遂感而題篇因起漫興以自警五首

可笑坡翁錯料事謾將出處擬香山若自中書舍人
去晚年未必不優閑

坡翁鋒銳禍難辭白老優游智可師試問崢嶸元祐
日何如偃仰會昌時

香山比我眼差大所望平生亦太奢洛下分司柳枝
舞猶言孤寂發嘆嗟

山資所望至零星穀僅充腸絲蓋形得此登時便休
退貧家活計慣曾經

廣陵江水碧於天一棹春來興渺然借問紅塵誰絆

汝歸期須趁落花前

余自去歲連辭玉堂不就諸寺正亦屢除輒辭
親知皆以冗官之辭爲太過室人尤以失祿爲
悶故戲題一絕

親知驚恠僕僮嘆皆道無端棄好官我自心安飢亦
樂就中難解細君顏

暮春有感

終南盡日斷人行唯有泉流泱泱鳴花落鳥啼春欲
暮就中愁殺老司成

辭持平後戲題

三字銜兼知製 教一條水作右持平拋來却向江
湖去唯有白鷗知我情

沈大哉楫自湖南亞使移拜通判戲題丁巳
君從蓮幕移通判我自薇垣轉副修囚我玉堂綠底
事虛名真箇是吾讐

憶貫之試士湖南未還

江南使者幾時歸驛路梅花已著枝多少樓臺登眺
處也應和我舊題詩

寄崔汝和

故人今直深嚴地講席應知啓沃多何似春江老漁

父滿船明月放狂歌

贈吳貫之永興淑問之行己未

烟花北路勝關西多少行人到輒迷若向歷陽聞一
曲雞林劍舞總筌蹄

贈姜叔夏赴高山

清時有味揔吾儕勝地郵官亦可哉光甫纔來君又
往翰林修撰太摧頽

送尹攀龍攀佐嶺南幕庚申

駟騎翩翩去若流清秋擬上嶺南樓從知題板詩名
重眼底平看七十州

挽周卿 二首

我亡我質竟何依
天喪吾身大半虧
知己縱云真忝
竊頗窺俗子未曾窺
童稚相逢五十垂
未嘗甘壞見幾微
相知相許唯吾
最言行當年識者稀
思君氣像只堪吁
公相爲期碌碌輸
後死敢忘相傳
約奈吾衰病竟難摸

挽崔楊根後寔 辛酉

纔哭周卿未一暮
奈何君又遽從之
君歸地下應相
見道我今如獨足夔

送鄭文淹赴龍安任所

貫之奉使汝和服
獨有詩翁時訪余
今朝又把一麾
去千里江南音信疎

挽洪北汀 癸亥

冰清玉潔似公誰
再長東銓雅望宜
最是從容全晚
節俗儒驅使也堪嗤

挽趙光甫持謙 二首 乙丑

衆人皆蕢君爲屨
屨蕢從來孰卞之
是非畢竟終應
定鷗浦風烟管者誰
貫之每道君情事
再娶無兒命可休
寂寞堪憐身後

計名聲賴有世間留

五言律詩 二十首

贈金秀才斯百錫胄 丙戌

足下在京日吾遲求友生到今不見面伊昔習聞名
以我必爲恠於君期盡情他年西笑日騎馬出東城

馬溪寓興 癸巳

幽棲君得地塵事不相關松竹開三徑茅茨築數間
供茶烹白雪暖燠斫青山晚計須同做燒丹服大還
次安子厚厚詩卷韻

此日看君作病夫幸取端頗存澤風氣不數島郊寒

驥子調金埒蠙珠寫玉盤相望衣帶水離思倍難寬

與周卿賦落花 丙申

忽忽韶光晚庭花片片飛辭枝雖未盡著樹漸看稀
較爾吾差健奈渠春已歸居然多感慨且復賞餘馮

崔周卿以詩慰余喪兒仍次其韻 丁酉

迸淚看君札荆扉日暮時誰知吾喪子却羨爾無兒
那忍三年內重遭兩度悲寸腸今已斷且莫記前詩

原韻

契濶東城陌沉憂度歲時政罹文苑病遙哭孟
郊兒惻愴投吾涕號咷想子悲秋風時撼戶默

誦去年詩

挽洪進士九成

脉脉西湖月悠悠東郭春契心曾此地回首若前晨
抵死無何飲論交有幾人今朝淚已盡不用更沾巾

贈李從兄咸戊戌

霽色終南雪春心渭北梅清香侵閣夜寒月遍樓臺
上客論霜劍王孫動玉杯長安逢季子豪氣未全灰

遊商巖懷周卿

獨往空山裏放歌人不聞水聲已清我月色應照君
側耳松邊籟會心巖上雲俱為醉後態俗物任紛紛

病中聞笳有感乙巳

隣笛倍激楚病裏不堪聞切切怨秋月遙遙穿夜雲
調傳出入塞葉有大中分若向關山路也應淚漢軍

燈火稍可親課製戊申

秋氣侵虛幌微涼繞小燈道心清似鶴書眼爛如鷹
舊懶登時去新勤逐夜增添油仍到曉更讀幾籤滕

次性聰寄示韻癸丑

竅法嗟登岸虛名媿倚樓雋詞驚捷敏剛韻困投酬
感序蟬啼露離聲鴈叫秋拈花一聯偈待爾散幽憂

世子宮春帖子甲寅

鶴籟春初動祥光繞彩雲青陽換舊序黃卷有新聞
正士須三接工夫較十分恭陳真實語桃祝晒虛文

洛山寺次巡相韻 乙卯

寶刹聞名久塵襟此日開茫茫碧海濶嫋嫋秋風來
白浪春沙岸紅曦射石臺孤雲天畔起極目思悠哉

次弼卿韻 丙辰

流光忽忽去 諱日 再暮 顯廟 又重來大海無邊浪孤
臣不盡哀鈴軒今日宦鸞輅昔年陪獨與臨瀛守相
看淚滿腮

獵騎圍邊月 以下三首課製居首

積雪黃昏後平原獵打圍將軍繡牌動猛士短衣飛
響疊霜沾鼓鑿酣月照旂星槍貫雙虎校罷載車歸

輞川圖

晚計藍田下溪山揔可娛雲深竹裏館波浥水邊厨
境靜琴為伴心清道與俱菩提他日恨寧不愧斯圖

河梁送別

共事先皇帝悠悠十九秋風沙俱到此宇宙更分留
都尉仍推髻移中已白頭陰山日欲暮握手恨難休

挽李南陽命聃 丁巳

曾從松丈座早識我公賢北里纔同閉南陽忽起阡

循良三郡最耆舊幾人全遺慶諸郎在家聲不索然

憶峴山

平生得意處月色峴山多雪浪明洲渚梨花照洛伽
翩翩愛娘舞嫋嫋采雲歌蠟炬迎歸路山翁醉已馱
早春睡起有感戊午

茅屋春眠起孤村聽晝春歸田真有趣處世苦無悰
草縷烟抽碧梅條雪拆封有時逢野老竟日只談農

七言律詩五十二首

過俞叅判撤江亭醉後吟呈丁酉

侍郎高閣傍江濱簾外西山爽氣新豈似敬通終落

魄還疑仲蔚是前身掃除宦海關心事占得滄洲滿
眼春爲問向來軒冕樂如何沙渚伴漁人

奉寄任鍾城有後彌萬休文已亥

莫道邊頭詞客稀靜翁姜丈此停驂先生又負詩名
去二子應留物色歸奚騎射鵬秋氣動戍樓聞鴈朔
雲飛從知校獵陰山雪不減寒松看月輝

趙元鎮相鼎挽庚子

華緘纔抵未踰時馳往呼君君不知文擬子安猶伯
仲才方長吉可填篋論文幾度青門夜贈我一篇春
雨詩惟有夢中樑月影依然澹石照襟期

贈洪文錫箕赴海州 甲辰

一絃龍鍾湖海邊詩名十載已華顛銅江佳句人爭
誦法浦清詞世共傳先子當時所畏也後生今日最
潛然春來驛路梅如雪回首西州眼欲穿

送崔周卿佐嶺南幕 丁未

吾友行裝坐可徵素知心事炯如水官醅縱慰離鄉
客營妓應疑入定僧自是男兒腸似鐵復兼羸病骨
生稜清河豈久宣城幕別緒悄悄不自勝

戲題 戊申

鴻鵠飢呼鳥雀肥古今此事最堪悲誰知燕市千金

骨不直秦家五綬皮捫虱高談常見笑屠龍亢藝亦
云癡廣津昨夜春波濶欲理扁舟鬢已絲

病裏偶吟呈周卿

一病彌留歲六周鏡中勲業坐徒休藥籠頻曬還多
事醫籍常披也遣愁白髮侵頭生稍稍青陽回首去
悠悠年來始得天君靜萬事方知不怨尤

送任公輔相元佐關西幕

殘花撲地已成泥欲唱離詞征馬嘶乙密臺前春漠
漠大同江上草萋萋魂留渭北愁如醉路指關西夢
亦迷東望慈闈回首處洛山迢遞白雲低

風昔維楊叅趙州至今十歲精神留我慙曾呂以上
客師是支深之亞流秋水涓涓底濯足春花漠漠空
回頭當年惠遠失元亮虛作廬山老比丘

次南壺谷龍翼韻仍寄性聰

聰也相逢歲十周壺翁愛我異凡儔桑門復見支兼
惠蓮社曾容宗與劉公已靜憑南郭几我慚虛倚趙
丞樓相思嫋嫋秋風起欲贈芳華不自由

送任文仲奎赴伊川

仙區行色莫躑躅此計君應爛熟思除說在朝多艱

瓶從知得邑最便宜參茶濃煮還嫌苦栢粥稀煎尚
怕脂但恐玉堂僚位缺使君清福不多時

寄題楊口新構東軒

一髮頭陀碧似染故人佩竹于其陰咄嗟一屋斲輪
手髣髴兩京循吏心山花灼灼照人眼谿水泠泠清
我襟衙罷庭空差耐寂滿簾涼月撫玄琴

孝宗大王遷葬挽

先王十載勵武功中道賓天恨未終仙寢衣冠今日
改神州氛侵幾時空人間暗灑英雄淚天下長教志
士桐敬誦宸章偏感慨九連城外漫秋風

任慶州有後文挽
偉元之孝馬班文塵世昂昂鶴出羣千古藝垣留定
價貳卿官品較浮雲下中公相非今日賢達崎嶇自
古云想得廣陵江上月清光依舊照孤墳
家難當年最困心人皆坦道我崎嶇自憐身世同司
馬誰識行藏卽展禽清畏人知看苦節文爲世法仰
希音一朝嶺海收精爽祇有鯁生淚滿襟

柳和順省吾挽

甲寅

家兄刺刺丈人竒每道交承和順時吏休餘威無甚
梗良陶遺化易爲治常嗟小縣才難展更嗇遐期命

止斯賴有賢郎能做得已將詞學耀門楣

簡送任學士公輔赴龍岡

任子將行索贖章離亭物色使人傷萋萋芳草東君
早漠漠寒雲西塞長紫禁幾年游鳳沼青春此日起
龍岡誰憐潦倒銅樓客獨抱殘經鬢欲霜

次牙山板上東岳韻示李使君光夏

乙卯

行子初從湖外迴光陰冉冉客中催山頭日暮雪猶
在浦口春寒花未開鄉信杳茫憑片夢病懷牢落托
深杯逢迎賴有風流守携我同登海上臺

次弼令韻

丙辰

東來冉冉已踰年北望羣山翠接天青眼幸逢千里
外白頭同戀五雲邊鬱陵縹緲環銀海蓬島微茫繞
彩烟理屐君今更何向道逢此地卽神仙

次韻

西坡

嶺邑棲遑再閱年恩書初下九重天纔聞旌
旆從關外却訪柴荆叩雪邊語到舊遊渾夢寐
閱來新什總雲烟休思勾漏還丹服玉署翺翔
也是仙

酒席次弼卿韻

休言浮世足嘲評且看尊前妙技呈暮境行裝同落

拓吾儕心事總分明琴歌陶寫還無賴詩酒賡酬却
有情白浪天風掀簸地中宵相對旅魂驚

籌邊樓

課製

劍外西南蕃詔連高樓形勝控三邊丹青細寫關防
險籌策遙收笮焚烟玉壘風雲迷檻外牂江物色接
簷前華扁一揭羣羌帽全蜀山河已帖然

九日次少陵韻呈弼卿

二首

嶺外逢秋秋思哀附書京國幾時廻殊方短日荒荒
落大海驚濤浩浩來佳節祇悲催暮境勝遊虛負上
高臺空齋吏退羈懷惡強摘黃花泛酒杯

暮年州紱 聖恩寬佳節他鄉強自歡旅客誰從嘲
落帽秃翁空自感歎冠高臺蕭瑟菊花老大海蒼茫
秋氣寒酬罷少陵詩上語縱橫醉草與誰看

贈別曹弟夏卿赴松禾

丁巳

海邑元非水土宜此行誰復惜低垂官居苦樂吾纔
試宦路升沉爾莫悲群從比年無一健老兄今日奈
全衰臨分爲贈安身策勝瘴無如斷酒卮

用前韻述懷

靜中惟有睡相宜門巷寥寥綠柳垂老境摧頽誰復
惜春光漫誕最堪悲危途乍涉心神損瘴邑新歸齒

髮衰眼底忘憂無過酒病脾猶喜受殘卮

次崔汝和示韻

疎慵不合處明時禁苑何心借一枝江上有田容放
跡世間無地可伸眉常憂計拙真成錯每患名浮果
受欺看子詩篇能捷敏老夫才退媿難追

送李平昌日三赴任

末路浮名禍所輸清時吏隱儘堪娛嗟余涉世無良
策羨子行身有坦途爲問雪天馳十驛何如春日駕
雙鳧一杯欲辦都門餞無奈泔泔瘴疾紆

予自襄陽承

召冒雪踰嶺故末聯云

別崔生歸峴山

今朝忽送峴山人却憶仙區淚滿巾
銀海千重一輪月梨花萬樹十分春
平樓雲遏歌聲切洛寺風翻舞袖新
惆悵勝遊難再續不堪華髮滯紅塵

寄梅澗兼呈青田李公殷相

烟花兩府稱佳麗較藝爭妍自古今
峴首清歌仍妙舞臨瀛寶瑟又瑤琴
當場誰復分高下入拍尤難辨淺深
想得周郎題品處應將神解賞繁音

兩府每以絃歌競長紛然不決梅令輒徐言必待家兄來可決優劣故云

次趙光甫示韻

處世休嘆計謬悠聯床且喜對青眸
寬心頓覺心還穩忘病能令病自瘳
已決此生辭宦海更將吾道付滄洲
林泉自有無窮樂不必棲棲浪作愁

原韻

嶺外東南道路悠同時赴洛會雙眸
恩除嚴譴俱休說舊病新痾各未瘳
松月三更青鶴洞烟波一夢白鷗洲
聞君旅壁留題句正似殘生歲暮愁

丙辰公自峴山承 召而余自烏山被拿而來

丁巳會宿於青鶴洞而余將返鷗浦故云且聞
公題詩黃庭旅壁以見志不勝敬歎及之

余於湖試過鎮安主倅待我厚觴於客舍甚樂
也要余以東軒客舍題詠余諾之而來旋直玉
堂連日進講頓無休息之隙每憶勝地遊宴之
樂秋花錦石清歌寶瑟黯黯常在眯夢間殆不
能忘而使君之托又不可負故寄題一詩以寓
神徃之懷云

憶昨南遊最爛熳華堂盛宴杳難攀使君醉後堆杯
案小妓歌時解佩環當日青山看馬耳今朝玉署侍

龍顏白頭禁直無歡趣勝地空教夢裏還

病中時想江南舊遊戲題

勝宴初開夜欲分妓粧蕪澤暗氤氳新詞壓倒狂通
判別曲誇張醉使君銀燭淚粘桃葉袖芳醪痕汚石
榴裙江南處處繁華地自愧風流未有聞

安岳妓仙香少日以善歌擅名都下因事放歸
故郡矣今以 兩大妃進宴被選都妓上京訪
余於鶴洞容貌憔悴歌響荒澁頓無舊日妙音
恠問之則歛袂徐指其歌喉曰坐此放逐淪落
窮鄉衣食艱窘不復理其歌曲仍悽咽不已顧

余與此有相類者余亦坐於文字虛名被絆玉
堂尚不得一麾以去鬱鬱成病吾視玉堂如牢
囚彼以故鄉爲竄謫是亦一異事豈非造化弄
人處也聲名之害彼此一律戲贈一詞

我怨文詞君怨歌聲名從古喜蹉跎玉堂變作牢囚
地故里翻成竄逐科貧賣舞衫嗟薄命病祈州紱奈
窮魔我如出守君歸洛君唱吾詞樂幾何

次李使君韻留題披香亭

明時自愧忝清班湖左名亭幸一攀三載頻經千里
役百年難得一身閑依依岸外遠川樹點點天涯何

郡山樓下寒塘秋已晚敗荷零落似衰顏

戲贈長城琴妓秋聲介

蘆嶺雖高大路平片時馳過古長城紅纓玉勒郵驂
出翠帶羅衫郡妓迎峽雨未能留遠客瑤琴只自怨
秋聲離歌纔了忽忽發似是無情却有情

文谷座上論西湖峴山形勝口占一律

西湖月出擅形勝風景依然卽嶺東靈石巧將天吼
似名藍偶與洛伽同峰巒轟轟青天外島嶼茫茫碧
海中駟路歸時探歷遍遠遊前後 聖恩洪
聞弼卿到京寄一律兼呈青田

嶺雪初消關路平臨瀛太守到秦京長公病起饒閑興
今弟歡深奉壽觥當日同遊大堤客經春獨臥廣陵城
遠寄新詩當迎送可堪烟柳繞歸程

分望

分望從來有定限敢將身世怨天公所營分寸神猶
惜自笑崎嶇命本窮榮闈豪華心久絕公侯將相望
全空廣陵春水扁舟興此事唯應付病翁

早春口號

戊午

偶出騎驢過御街忽驚春色萬人家回頭搖蕩千絲柳
照眼分明獨樹花老去漸能知酒趣愁來那得禁

詩魔東風浩浩吹衰鬢酩酊狂吟日已斜

次黃佐雪後早朝韻

以下六首課制

霏霏曉雪似瓊塵霽後金門景物新影射火城光炫
目色和蔥佩冷侵人馬蹄凍蹋銀杯路鶯語寒啣玉
樹春紫陌須臾朝日暖消融亦是任陶鈞

次吳溥玉堂齋宿韻

虛名來逼受全欺玉署還驚歲律移自是危巖憂忝
竊非關名路歎棲遲閑愁凌轢皆心恙好事差池奈
數竒唯有拂衣江海去逍遙庶可展襟期

次吳國倫除夕韻

家椒酒喜迎新永夜沉吟獨損神風雨一場暮換
世江湖千里夢催人愁經玉署驚心地厭看玄都滿
眼春欲作明年漁釣計那堪一念繫楓宸

次黃姬水落梅韻

漢女墜瓊屑重楊妃洗面粉痕空芳魂寂寞西湖
上香信蕭條灞水東初似殘星隨落月更疑飛雪舞
回風莫言墮地成灰土猶作新粧錦障中

次楊慎古塞下曲

胡天漠漠但黃沙校尉年年此建牙寒早陰山先見
雪春回古磧尚無花佳人夢灑閨中淚壯士魂消月

下笳虜騎憑陵漢兵少功成何日得歸家

次李攀龍冬日登樓韻

風卷寒氛天氣清危樓落日四望平騷翁自抱千端
恨飲客誰留萬古名凍雪鏤銀山送色冰江鋪練水
沉聲傍人謾說登臨興不識龍鍾歲暮情

聞崔汝和入玉堂寄一律兼示貫之

每恨浮名坐受欺誰知君與我同之差強人意唯君
健不厭羣情歎我衰玉署直來多苦况綾衾携處少
歡時廣津春水扁舟計庶不全然負素期

更次前韻呈汝和貫之

弱拒甘爲猛挈欺悔將羸卒妄挑之君才衮衮師方
壯我氣厭厭鼓欲衰盤馬已成摩壘勢牽羊將見豎
幡時玉堂無事終南靜正合詞壇請戰期

次韻

明谷

詩壘真遭老將欺先驅示弱後張之未應執弭
爭雄長不待交鋒已竭衰毒手厭拳非浪語陰
符刺股怕同時春來岳麓饒佳趣更卜偏師白
戰期

村居漫興

時聽林鳩隔屋啼雨餘庭草日萋萋滄江日月身無

絆魏闕風雲夢亦迷病用俗方詢野老釀傳新法報
山妻明朝擬赴前村社菜餅燂雞也自携

廣津江村卽事

廣津之東有吾廬廣津之道膏吾車青山數點黛色
淺春鳥一聲花意舒久矣絕交山吏部超然勇退白
中書江村耕釣亦多事日暮歸來仍荷鋤

聞自玉堂移除憲職書懷

二首

少時矜厲慕雲林中歲蹉跎遂至今雖免深源書恠
事敢期安石展疎襟浮榮久覺爲閑物除目何嘗損
道心寥落江居夜分後詩成抱膝獨長吟

自笑羸疲一病身誰能驅策耐風塵甘從拙宦嘲粘
核敢向清時歎積薪真洞烟霞尋舊屋滄江漁釣趁
新春春來作社饒村興漉酒烹雞豈顧貧

次貫之韻

小屋新開迷浦濤落花流水掩門深閑來漁艇仍頻
掉病後村醪尚淺斟與世無營真避世從心所好是
安心煩君他日容相訪共岸華陽看碧岑

六言

病中雪夜書事 二首丁巳

靜聽松風送響閑看雪月揚輝病裏雖停飲酒愁邊

那廢吟詩

四百千峰白雪一輪萬戶明月今宵欲訪閑人何處
相逢好客

南岳集卷一

南岳集卷二

五言古詩 十首

春帖 癸巳

春來作春帖了無事可祝朝飯啖一升詎可望食肉
 脯酒斟數杯不必羨浮白以此送生涯富貴是何物
 年來好靜觀益覺神理熟只擇善與惡不問凶與吉
 禍福何與我付天以爲得燒香點茶外萬事都不屑
 余如槁木死灰者久矣世間羅綺之想絕於夢
 寐昨夜栩栩然就寢如貴公子者挾名姝貞操豔
 貌殆世所未有也事頗恠秘可悲可悅而宛轉

了了不類夢中事覺而異之遂著于辭丁酉

金釭射彩姿澹澹色青熒錦帶醉公子睡起芙蓉屏
佳人嫩未鬢翠髮巧相縈天然古仙人揚蛾撥金箏
座中縵胡纓惡少氣頗獍銀波頻曼眇鼎坐片膳傾
腥血迸秋濤七首光如霜向余前致辭皓首不相忘
宛轉情未了蝶隨春風驚曲沼菡萏波淒淒如酒醒
豈減人間樂空餘夢裏香宋玉太剛腸錯笑楚襄王
戊戌九月夜夢在東郭與周卿子淵慎甫壽卿
知卿徘徊東嶺崔監牧亦與焉時向薄暮仍陟
東山松陰葱蔚共誦淵明歸去來辭約誦罷則

休冉冉而前數里許老松數十盤錯塞路相與
蒲伏其下余失履跣足周卿亦跣足前有一壑
幽靜窈窕忻然散步眺望移時又有美酒柳棧
盛八梢及鮫魚味甚珍環坐擘而啖之使婢酌
酒酣暢岳母似爲余辨者也壽卿怕冷催歸周
卿厭其爲余亦笑其俗氣未除須臾酒盡岳母
又遣婢欲送秋露一壺衆皆顰眉余亦恂恂顧
謂婢酒後不宜以燒酒繼更誠以清酒或白酒
周卿從傍揶揄而戲笑余辛勤經理余不以爲
恠者蓋周卿平日喜則輒笑故也仍惺然而寤

其樂不可把玩黯黯久之豈往日楸江之遊遺
恨未散而發於此夢耶可異也詩以志之以寄
周卿諸友求和 戊戌

秋風吹我夢翩然上東山從我五六人中屢清而閑
松雲襲人裾路出蒼翠間共誦歸來篇放屐相後先
闕珊偃蓋下遂得壺中天山深近黃昏洞古鎖青烟
幽趣政可挹登眺皆忻然雖無謝公妓幸有淵明醅
畢罄方自持莊蝶還相催遽然在枕席坐失碧山色
爽氣久不散悽悽有餘惜我輩雖嘆惜閱世頗先覺
奈何落塵臼苦受俗累縛向非一夢清此患誰能藥

有時神往處天公不敢閣何時買田去占斷黔山角
抗手攬歸雲舉瓢吸江月誓遂徜徉計不羨夢中樂

挽李萬英大夫人

恭惟大夫人先子之岳母在余殊瓜葛於兄實哺穀
吾雖非自出視同血肉受起居阻湖海尚喜康而壽
今秋忽承凶驚怛心如剖本家長安中屈指稱富厚
金帛結姻媾尊酒奉姑舅後堂累錦茵前楹揖紫綬
侍兒拂朱絃歌謳哄左右豪華詎幾時零落一翻手
竒禍忽稠疊所天厄陽九零丁六親孤流離喪亂後
就食江之南田畝以糊口抱孫日已久拮据看漸阜

積粟有餘庾烹魚恒滿釜抗榭壓錦水波濤盪戶牖
祀嘗供魚菽歲時剩漚滄鹽井兼射利丹穴擅世守
崩城等杞妻築臺埒蜀婦誰謂巾幗中賢智素所負
心如丈夫雄髯婦看已醜衰老聽子孫含飴到壽考
奈何禍未除晚節慘嗚叩慈孫又先逝天道果何有
悲夜纏末疾奄忽辭塵白吾兄久淹留春夏侍砭灸
慘慘對孤寡血淚灑南斗歲暮霜雪逼悲風吹瀏瀏
欲徃道路脩天未空回首寔不親相紼莫不躬椒酒
慟哭眺東南此恨終永久

挽下叅奉搏

壬寅

先子昔屏居晚節厭朋徒惟君先侍郎情義終不渝
所以兩家子相視同葭莩當時百不憂我州君未鬚
參差肩以隨聯翩喜招呼泊君叩盆後作余少姨夫
世誼兼同贅交情比舊踰緬君遊泮日白晢美如瓠
容姿既舉舉頗爲流輩趨少年隨父官歌舞遊名都
飲噉得所便裘馬頗馳驅自從侍郎没家事漸凋剝
喪患又因仍觸事鮮歡娛赴舉竟蹉跎筮仕亦崎嶇
摧頽顏遂低萬事失所圖回看舊游輩朱紫半已紆
屈指四旬餘忽忽好事無爲農廣陵上衆口恒難餬
瓊尾田舍間貧窶困逋租營營念窮計洫洫憂妻孥

南岳集卷二
拮据忍辛苦奔走頻征途嗚呼邁厲疾神理不可許
窮村病已革藥物亦難須慘慘那忍說今古成須臾
毒厲忽熾蔓賄吊皆踟躕年未克塤此事亦堪吁
念君賦命奇欲說如舍茶官董寢郎休科纔蓮榜輸
龍鐘已可恨籌筭胡未敷少姨髮如漆悲啼血滿襦
稚孤未婚嫁呼爺哭嗚嗚扁舟返故鄉秋日丹旌孤
我居近馬溪與君隣社榆借賃傾有無情味淡肌膚
看花同古寺釣魚共前湖此樂竟蕭條晚計誰與俱
我從君逝後危疴亦纏軀冬春濱九死經歲尚未蘇
榮衛日削弱服藥漸槁枯送不親奉引莫不躬提壺

孤負平生誼愧尤終難逋緘詞謳相縛血淚空沾濡

挽崔進士錫齡

戊申

病夫閱人多億中頗自伐較量毫釐間其法蓋不一
受氣或不純雖才未必達賦形或不全雖賢未必福
嘗求純且全畜眼惟君獨形而無不完氣而無不實
其賢宜其福其才宜其達他日卿與公舍公指誰屈
每見輒稱道津津不容說胡爲遽不淑使我驚咄咄
思之不能得茫然無可詰徐思理之變跖壽顏夭折
予奪太乖戾所以於君失從古或有此亦非吾眼瞎
嗟我與君家通家如骨肉托契伯仲間不啻膠與漆

尊叔卽我兄尊從卽我姪我稍一日長撫君童州日
往年居比舍還往情愈密君時服持重斬斬在衰經
徃徃叩君業瓊瑤獲寓日下筆法山陰綴賦泝湘蜀
意謂七日駒終作蕭雲足科名果題鴈妙技如中鵠
華聞日駸駸流輩不敢敵庶期副吾言自詫藻鑑的
奈何纏一疾沉綿竟不藥謝庭慘摧蘭青山忍埋玉
慈母失夜節寡妻悲晝燭兩箇男與女子子終焉托
豈獨親知泣尚使行路憾頃我臥沉痾骨枯肉盡脫
君來見我驚握手淚欲啜孰謂未一年乃反使我哭
健物而病全死生理難測我病尚未除戶庭僅匍匐

不能躬相紼題詩愧冥漠

布穀催春種

課製丙辰

渚艾已藪藪陌桑又箇箇不待布穀啼已識西疇春
雖使汝催種奈此儂家貧昨探葫蘆中已充糝粥仁
無種可奈何聽汝徒傷神

奉送藥泉相公南公九萬燕行

丙寅

誰謂鴨水濶相公舟再柁誰謂燕山遠相公車已熟
舟車徃復間愼愼賢勞獨所以奉使意爲公約略說
昔有種蠶輩主辱期復雪不憚賂句吳一一中其欲
我願相公心種蠶以爲的不耻屈拜耻不辱贖緩辱

忍此耻與辱能不亂大策此非鄙人言邦人所囑祝
贈貫之別語發明此篇之義下索覽之如何

贈吳貫之燕行

吾弟啓燕行衝暑苦炎熱答云吾所苦有甚於苦熱
車載二萬金無辭貢于獫皆言此罰金我 王罪以
贖茲說甚痛憤若將市朝撻有便卽呈文主辱期一
雪彼又不我聽埋骨燕山側余曰殊不然子其聽我
說文王事昆夷太王事獯鬻犬馬珠玉外爲辱不二
一 仁祖法兩聖畏天身則屈當其丙丁間彼言不
敢越內修而外供 三世如一日隱然復雪意未嘗

頃刻奪奈何罰金事子獨以爲辱容有加於此尚且
忍而活常時所行事事踰金罰君獨指罰金此吾
所以惑區區伸小忿總小功之察况彼卽犬豕犬豕
又何辱善言不足喜惡言不足怛贖緩因厥愠徵貨
奈素習分别是與非呈文反爲辱看彼種蠹輩蠻夷
極微屑觀其猷夫差一一中所欲及夫沼吳後事業
光簡牘惟此耻罰金拘攣妨大策君如或聽瑩厥旨
未昭灼胡不持此義質之南相國

挽李佐郎台揆

丁卯

憶昔在東郭少小相戲狎惟我及周卿暨君三同甲

弄瓦巧取雋戰甚恣相確擲柶樂歲時乞利效厖投
獵酒遍郊坰遇景得騁目俱爲少年樂老境嗟無及
世誼兼故舊交情比鷓鴣雅量推周卿峻潔唯君獨
以余無所似自慙兼倚玉世事足堪歎我病君夔屈
出沒風塵中一第終見厄蹭蹬從蔭仕遺愛在二邑
僕歛刑部郎才命不同的晚計在郭外生理極蕭索
與余居止近公餘必見歷握手必話舊杯酌必爲設
君猶尚平康飲酒不餘瀝我鬚白如雪君髭黑似漆
我齒餘三箇君恒嚼大肉我衰而君健健羨方自切
奈何過余飲未滿日五六承凶在俄頃痛哭淚相續

君以相家子文行罕與匹摧頽困管庫殆非意所度
揆以乘除理固宜享艾耄問天胡不然天道不可詰
我自周卿沒端如夔獨足伊况君又喪冥然瞽失策
孰謂病者存而使健者物賴有二佳兒文學自瞻博
俱能繼家聲餘慶日陸續我又添暑病適當辭諫職
不得哭送郊惻惻愧冥漠

七言古詩

少年行贈內兄李生成

戊子

李生才調脫尋常少年意氣何堂堂又是姿容美丈
夫周郎錦瑟荀令香大鵬一舉九萬里他日功名不

可當昔逐城東游冶兒西郊南陌恣顛狂濟州猪笠
漆映日杭州綠綾裁爲襦清歌愛唱江南曲小舞學
得邯鄲娼宮傍女兒腰如束一笑令人堪斷腸於義
洞中黃昏月相逢轉眸解明璫滿城桃李次第開春
風楊柳垂宮墻斜陽走馬烏城宅半夜飛丸白峴坊
俠名不肯數金稱電推何曾饒鄭郎千金重軀一朝
輕積謗薰天嗟可傷比來折節獨閉門馬史漢書盈
舊箱日本寶刀藏玉匣大靜生駒馬絲繯自古失身
貴自新向來薄倖何用妨况公家世生公侯願君立
志須自強天生君才豈無用不靜邊塵卽登廊他時

富貴生光寵應悔曾游游俠場

夢與晉叔族翁論詩因飲薄酒戲效東坡薄薄
酒詞有請君慎莫愛良田請君慎莫愛良馬之
句盖取鐵木太祖美色名馬人皆悅之一有繫
累卽能壞名敗德之言之義也餘句都不記覺

後仍吟成篇巳丑

請君慎莫愛良田薄田力作同良田請君慎莫愛名
馬駑馬著鞭等名馬名馬良田愛者誰近來枉死金
成之良田萬頃馬千駟他人耕種他人騎鐵象馬悲
曲都統城南田殺竇魏其箭野新蓄春尚綠竹洞追

風曉無迹願騎駑馬耕薄田優游可以終殘年

次韻

晉叔

請君慎莫愛良田爭良起奪惟良田請君慎莫
愛名馬折脰播腦惟名馬駑馬安薄田便好者
誰良田畏名馬憂孰知之享萬鍾有千駟藜藿
羹欸段騎二者之分憂樂異分外之求將曷其
中都豪貴林廉宅曲欄朱閑揔陳迹無將薄田
羨良田駑馬可以終吾年

白雪行同諸君賦

白雪壓山山鬼泣朔氣閣天天關折從他謝女鬪飛

絮坐使潘姬失顏色瓊瑤眩眼滿天地郭外青山青
不得高堂暖酒不覺寒坐上人人梁苑客請君拋却
歲晏心聽我一曲陽春吟

採地黃歌

庚寅

莫云叔夜被殺戮且見淮南上空碧兵解其如司馬
氏丹成無奈秋風客華岳春騎二茅龍瑤池書借三
清鶴千歲霜清上黨松一朝雲飛偃佗栢顧我平生
蘇門嘯汗漫青天海上訣少年伐壽近黃泉晚歲何
功拋白髮願作青門地黃仙日暖丹田生紫烟

奉送任萬休丈赴寧海任所

癸巳

先生昔隱太白下幾年烟霞夢太白三年泣變松楸
色一麾行看竹嶺雪故山不妨尋花竹仙島何曾費
時節老鼉吟風窟宅尊巨鱗跋浪滄溟窄由嶺東南
一千里方丈蓬萊左右揖歸來倘叩錦囊底不盡千
秋海嶠色

釣魚行奉送任萬休丈赴江陵任所

丙申

上世嘗有龍伯人一釣六鰲三山掀又有會稽任公
子大釣釣魚滄海翻壯志濩落少適用但令異事留
乾坤先生氣壓二子者文章炳炳德業尊仁義以爲
竿道德以爲綸欲釣淵魚於潑潑之泉源假與此輩

生並世有如斥鷃之於鵬鯤莘野磻溪文人行下視
隆中富春如兒孫垂竿昔隱東海上佩竹今承北闕
恩六鰲骨爲千古霜五馬嘶向三山雲海上烟霞自
明滅群仙遊戲共綽謔且與永郎可伯仲若遇盧生
便僮僕口吸雲氣隨飛龍翩然上下于碧落有時廣
張六百釣更費香餌五十牯釣得鯢魚碧海底膾炙
飢民徧鼓腹不然釣魴棄陽鱗笑寄廣陵江上客

挽洪善長九成

丁酉

倏忽彈指古與今幾駕神馬乘尻輪卽論往來弄丸
間殤子錢鏗俱一巡沈郎清瘦滓穢去王弼道富年

運貧七尺已付千遍呪兩兒猶作雙麒麟青陽未滿
三十秋玄宮長鎖一萬春乾坤牢落我獨存吊影堪
悲滯風塵自從辱居姻婭後期君魏舒以上人屋後
烟花傍古苑尊酒詩篇春爛熳十年人事箇纔橫千
古徽音絃已斷跼蹐君同子桑戶編曲吾慚孟子反
淒涼古宅泮橋側寂寞新塋湘水畔秋山眼冷蘿花
白渺渺游魂更何適輻前一聲薤歌裏清淚泫泫灑
空碧

奉寄任鍾城有後文己亥

先生之道可以澤斯人先生之文可以牖凡民君門

汲引多少年漢庭不識任安賢白首今爲邊塞吏奮
髯抵几任軒輊廣陵春樹夢中碧一曲胡笳敗人意
關雲霽霽接地黑磧雪皓旰漫天白北走韃韞萬里
餘大海盪洶歸尾間落日彎弓石作虎暮年佩符金
爲魚末路誰憐素計違平生自與青雲疎賤子受知
也不淺邇來屢枉空中書去年再拭清灞淚每愧長
者虛延譽江城歲暮驛使稀欲寄新詩春草生西山
依舊青刺天回首時時惹人情行人臨發尺素短好
音幸付南來鴈

憶昔行贈趙光甫庚子

憶昔青門如昨日與君兄弟同膠漆青春酒賦恣驩
謔左以善長右平叔君爲齟齬少弱弟驕驕未馬鷹
未翻回首悲歡僅十載眼中光陰駒過隙人間賴有
季方存泉下空悲子安歿喜君頭角已嶄然愛君文
詞更清絕孔融豈少禰正平魯肅還驚吳下蒙交道
何妨付李孟嗣宗自是憐阿戎看君落筆真勁敵使
我捲甲如畏蜀昨者曾同澤官射老師宿儒皆辟易
肉眼終迷日五色惜哉未消孫山厄龍門暫蹶千里
蹄羊角終搏九萬翼病夫嘆惜少成事鑄錯空消六
州鐵少時文章學西京半世居然成濩落虛名藉藉

凌雲賦未逢狗監空自惜平生一當單于心今日那
知困三黜顧慚虛辱侍郎知延譽頻蒙拂拭情劉惔
片言孝廉重季布一顧曹丘榮非關調護故人子自
有骨肉通家誼當年任昉盛交遊唯有孝標憐孤稚
舍恩敢向長者說感激每覺肝膽立茅齋溫祚古城
外歲暮歸家但一缺君門射策不得意江上爲農歲
衰惡江雲拍拍天欲雪北風吹衣黔山黑閉門饑臥
動悲吟却笑壯志還蕭索吟成寄與同心子政欲博
得崑山玉

自嘲丁未

良齋先生何許人半世落魄飽奇窮齒落耳聾兩脚
蹇年未四十成老翁詩同孟郊欠一第文似相如病
百倍十年藥石孰可忍一疾膏肓終未差身上無非
受苦惱胸中未嘗萌怨懟賦性狂褊俗不恕行身瘦
拙世所背自許經綸衆輒笑每談世務人愈駭早歲
文章嗟枉費晚學一事真有味問君此學安所受又
問君師在何地不受明師函丈間只在靈臺方寸中
日日點檢無他事唯知不負主人翁不帶革帶不幅
巾不能長跪與低言不持清議罔世利不解交遊釣
美官徃徃被髮似嵇阮歌呼酒賦窮吾歡賢者趨名

愚者利終日擾擾不能止余獨無爲於其間俯仰只
有天與地末俗誰知有心人舉世爭笑無腸客時行
時止縱不敢不知不愠庶自力家人不識甚魏舒里
閨昧名同列子譽謂騷墨毀謂癡毀譽不過如斯耳
呼牛呼馬口便嗒誰聖誰狂心自識安知此翁之心
事雖畸於人侔於天有時超然神徃處明月滿襟風
無邊

挽朴其昌

女有紅顏命必薄士有高才祿必折五福皆歸塵垢
囊才子何言空掩抑誰能梯天問司命此理茫茫不

可度吁嗟昌乎亦此流豐者其才嗇者福胸中磊礫
惠五車筆下睥睨唐四傑舉舉清標玉爲樹壘壘玄
言瓊吐屑蓮榜題名亦早歲澤宮屢雋人誰敵每惜
文彩合玉堂只恨生地如端木豈料無嗣又無年欲
說令人增愴惻箕裘一第更蹉跎江鮑傳家竟誰托
劉塚誰憐桂無花謝庭終悲蘭未茁我有一言慰冥
漠君若有靈肯我說吾聞畸人合於天得於此者於
彼失人間受用太埋沒地下修文定輝赫况是乾坤
一瞬間殤短彭長亦同轍區區得喪奚足論細故芥
滯非賢達嗟我兩世先分厚情義通家如骨肉復兼

葱竹近居止少時同師長同業張軍子欲嚴鞮鞞專
場我亦持矛戟猥蒙推我似晉楚豈敢視子如滕薛
羨君寸管能測候愧我大瓠空濩落若論大篇春容
處或可吾差長一日每到程式駢儷語精妙使我甘
屈膝期將此樂了此生豈意如今便陳迹細雨清尊
廣陵夜一榻論文那更得鍾期旣死牙絃斷郢質已
亡風斤輟我患躄躄阻相紉欲題哀詞淚相續嗚呼
送君長已矣去去好入寥天一

送李仲車積赴新溪任所

昨別子淵宰奉化今送仲車令新溪二子醇真俱可

人胸中坦蕩無町畦我性褊滯寡所合獨於兩友成
莫逆往歲與君居比舍益得心事情愈篤霏霏細雨
城南夜幾度論心動春酌回頭已作數年事我病經
年臥東郭君方供劇在水衡適值邦家築世室董
役山阿積閱閱受賞勞勩超資級君今得縣調山峽
豈嫌良殘與邑僻官門牢鎖絕過客訟庭無人少簿
牒舊書穩讀春晝靜新詩欲就山花落解渴政可咽
酸梨佐酒時復持雉脚嗟君宦味也不薄始知福人
耐清福我從年來益蹇連萬事自斷休問天况復跼
躄心地閑雞肋早捨名利間每送故人作太守獨守

書帷飽寒酸空將別恨供苦吟濺淚驚心花鳥闌

四憶一歎詩五首

憶神宗

憶昔神宗壬辰歲島夷大舉侵我國湖嶺瓦解兩
京覆廟社不守君幸蜀我王忠誠孚上國遣使
帝庭遂告急天王赫然送天兵漢家將軍三十六
持節督戰楊經理仗鉞先驅李都督劉家鐵騎山可
撼陳家水軍海欲窄平壤一戰勢破竹行長褫魄清
正帽泗川殘寇歸且窮義弘頓足秀家哭妖氛掃盡
海不波一片青丘宛如昨首尾壬丁六載間猛將勁

兵來陸續遂令瘡痍半天下 帝念我國不爲恤我
國告飢船粟哺我國無兵揀師習愛如慈母教嚴父
帝心勤勞恩罔極東國蒼生億萬人一毛一髮皆
帝德南山之竹尚可罄天子之德難盡述東海之波
尚可枯天子之恩難盡答回首乾坤未百年世間萬
事多翻覆建夷崛起抗中國風塵瀕洞驚遼碣昏朝
首鼠是可忍陰通北虜甘背逆戊午王師化盡沙姜
金解甲羞難濯丙丁之耻尚忍言事從權宜猶可說
椴島胡爲反助桀乃以大怨報大德况今漂漢事尤
駭欲縛恩人媚讐敵區區名節已掃地忍心害義天

理滅却想神州盡腥羶朱衣血祀已殄絕故國春風
寒食節誰灑園陵一盂麥 神宗大恩寧可忘立祠
庶可報萬一嗟我兵力單且弱百世深羞縱難雪四
時香火寓不忘猶勝魯國存告朔我欲排雲進此言
九虎狩人守天闕大官吟啊保腰領小官碌碌懷姑
息大義墮地良心偷誰念陵夷國不國撫事流涕獨
慷慨中夜悲歌心抑塞

憶 宣祖

憶昔 宣祖神武姿入繼 明宗有聖德昇平百年
八路安舉國民不識兵革漆齒潛懷射天計跳梁海

島養毒螫假途乃欲虞公我送使移咨恣恐喝我
王忠義寧受禍豈憚危亡負上國遂令蜂蠆增怨毒
果致移兵先我國玄蘇詐謾金吾怒政宗魚休甲斐
躍千艘蔽海劍耀日萬砲齊聲天地裂徒川背水非
韓信烏嶺失險真趙括賊騎乘勝勢無前敗書夜報
烽火急 大駕蒼黃向關西九馬不前金鞭折當初
倉卒尚忍言百官跣足三軍泣行行董到浪江西乞
援帝庭 帝心惻盡發六郡良家子荆楚奇才仍劍
客腥氛掃盡咄嗟間青丘依舊山河色金甌不缺
龍馭回佳氣葱蘢向丹闕中興雖荷天朝力我國將

相皆俊傑白沙漢陰兼厓相舜臣千鎰與權慄或盡
謀猷或宣力或作干城或帷幄蒼生濟出洪濤中赤
手爭將扶日轂皆由我 王能任用盡是我 王功
與德若非我 王能事大 天子未必如拯溺若非
我 王能愛民 祖宗未必降陰隲孟言微禹吾其
魚孔曰微仲吾被髮我 王功不在禹下區區管仲
何足說衛國忘亡周命新恪謹侯度終貽厥常懷至
誠報大德欲令世世事中國昏朝不君神人棄戊午
通虜天所絕丙丁以後事大謬 先王至意竟難述
彝倫墜地節義亡 神宗舊恩無人識故國春光染

腥塵穆陵烟樹傷心色

憶 仁祖

憶昔 仁祖在冲年 宣廟撫頂識天意龍潛初九
人莫測 上聖之姿蘊德器昏朝淫戲天棄汝滿庭
姦臣爭獻媚鄭普黃泉秦別宮一國無母倫紀墜萬
姓遑遑思真主皇天眷顧在 聖躬二三元勲爲時
出文有延平武完豐延曙半夜天助順義兵入城三
千同衛士解甲迎聖君咄嗟之間已清宮 太后珠
襦坐武帳聖孫前跪環羣公昌邑伏罪遜私第羣奸
盡輟都市中革弊布惠民心悅去邪任賢治道隆甲

子之亂丁卯胡去邠蒼黃塵再蒙丙丁之間天又禍
北軍飛渡誰能禦邯鄲朝暮晉陽急孤城援絕大事
去古人雖耻城下盟權不失正聖所與太王事夷鄒
聖稱鄭伯逆楚春秋許清陰節義耀華夷崔相忠誠
活邦國時運雖危國有人 宗社垂亡幸再續光岳
沉淪羞莫洗 聖心猶自懷慚德滕雖犬豕心猶漢
日夜憤泣常激烈十餘年間薪膽志金石可貫神可
質大志無緒竟賓天空令義士暗嗚咽吁嗟 聖主
不世出不幸遭罹邦運末中間禍患雖屢更實由天
時非失德亂離雖頻德澤深王業民心終固結若使

先王在中葉不下 世宗仁與福付托終能傳 聖
子遂令國勢如磐石良史應書癸亥春赫赫千古垂
鴻徽小臣作詩歌 聖德若有諛辭天厭之

憶 孝宗

嗚呼 前王不可忘盛德大業何煌煌鏡意恢復宋
孝宗側身修行周宣王雄如漢祖敬儒臣英似唐宗
友弟兄漢唐賢君豈不多若說家法皆多慙唐宣雖
賢不能事郭后漢文有道不能容淮南 先王孝悌
感神明虞舜周文文人行趙普無計撼秦邸馮統不
能疎齊王格天之孝奉長信貫日之忠恩大明宇宙

無光大耻在腥塵未淨 宸心驚十年 臨御雖倏
忽規模宏遠人皆說英雄大計厲士馬唐虞至治收
巖穴宮中一夕玉衣舉敬義齋空但明月大事未半
中道崩空令志士淚縱橫我願長驅十萬兵秋風雄
鎮九連城一讀 宸章一灑血矯首問天天冥冥

商舶歎

萬里鯨濤深復深飄飄商舶來何處自言 大明之
遺民袍履簪裾頗舉舉丹砂竒錦爛且煥摧槩敗楫
依浦叙再拜叩首乞生還耽羅太守不肯許海外孤
島誰復知馳書告朝何太遠 君王聞之念舊恩欲

送燕京心慘沮豈惜萬金贖汝身只恐清人聞此語
尚書作色丞相嗔區區清議難容喙乾坤今日盡犬
羊獨汝正朔猶未改都人爭睹漢衣冠灑淚相看不
敢語腥塵滿日吾左衽奉顏今朝羞見汝盈庭愛死
萬口噤泰山反輕鴻毛重呈書乞哀呼不應萬端悲
辭煩且痛書中且譏秦無人誰信吾謀適不用十月
天寒薄衣裳北風砭肌關路長去矣死葬蠻夷中天
若有情天亦傷書生妄計何足云欲進一疏扶彝倫
九門深深闔者怒泣抱血紙空逡巡觀者駭笑聞者
謗世道人心難重陳君不見國武招過在盡言慎勿

慷慨舌頻捫

漂人恨效元白三長俚體

耽羅漂漢稱林寅其徒復有曾與陳辭止雅甚簪裾
華自稱士族福建人棄學結束隨商旅因風漂泊到
我國船中糧貨半傾蕩只餘丹砂綾與纈再拜太守
前致辭泣乞全生返鄉國太守驚懼不敢許馳報
朝廷語大泄 朝廷只畏清人知朝議紛紛久不決
或言小仁亂大謀或言禍機不可測 君王竟從大
臣議反謂清議皆迂濶縛送燕京已歸一發遣備郎
催裝束行行馳傳急如電航海帆風不踰月又恐華

南史卷二
二
人不肯來誑謂 君王邀汝語驅來累累八十人來
駐都門十里外欲入 王城不許入爲是朝家羞見
汝華人始覺被欺詐驚呼墜馬環徒侶差官催發向
關西求死悲啼不肯去相公盛氣思妙計白遣黃詮
諭 上意仍具桎梏誘且脅景象慘惓堪嗟喟縵硯
兔毫寫呈文字字悲苦令人淚文辭雖粗意甚憐舉
朝不聞如充耳廟堂厭聞永歷號揮手嚴呵極秘諱
漂人豈識鄭成功舌官但承丞相旨都中人士共奔
波欲聽華語爭來似金吾防禁恐漏泄排戶踰墻呵
不止華語喃喃說何事只說鮮人沒天理胡人疾我

固其宜鮮人陷我忘恩義早知鮮人甚於胡悔泊摧
檣投此地早知駢首入虎口悔不捐身葬魚腹自古
蹈海非一人周有魯連殷徒狄吾儕雖愧古義士那
忍偷生向胡貊只恨 神宗無遠慮浪費兵力存東
國東國遺民反殺我畢竟寧無天道極悲來却憶鄉
井事父母妻子腸應絕雙親垂白失夜笳寡妻啼紅
如晝燭遙想家家作虛壠攬衣招魂葬已畢異地風
霜多苦顏萬里驅馳困顛踣語音不通恣欺謾滿腔
悲懷向誰說千般哀訴不忍聽說罷齊聲皆痛哭平
明迫脅上馬去哭向胡天心已死燕雲漠漠北風寒

回首江南千萬里海波嗚咽流無極悠悠此恨無時已

少年行 壬子

象把雙刀半繫鞵織紫廣鞞全橫臂班錦咆哮繡雙
翡翠窄袖裁從新樣衣單縷網巾壓眉頭逆掃胡鬢偏
膽氣洛陽誰家月滿樓曲坊四娘馳名字瓊壺水拍
夜半籤赤鳳喚驚癡鸞睡雨跡風蹤杳何許香閨脉
脉愁無語惆悵明朝東苑東鞋底泥泥惜殘紅狂心
忽忽詎肯省綠衫又拂梨花風

自訟

少時經營太迂濶老年襟懷日局促恐被知道者所
笑有時點檢面發赤從來文字不濟事自愧詩書空
枉讀却羨南村飼牛漢不識一丁心地直淒淒兀兀
謾自訟咄咄嗶嗶竟何益清風浩蕩月照襟一醉陶
然尋本色

山石

屋後有山山有石小者如籠大者屋突然削立萬仞
壁壁上雲氣參差碧南岳老人住其下山石欲壓壓
不得嗚呼山石壓不得放歌一聲山石裂

洛寺酒席長句示弼卿養一 丙辰

臨瀛水城兩使君俱是玉皇香案吏我亦曾忝玉堂
仙今日棄置東海涘海外相逢齊拍手人間榮辱一
啓齒吾儕於世已抹撥連壤爲州亦幸耳五馬何幸
來相過高堂置酒酒如河大堤千古繁華地醉守風
流亦堪誇十隊紅粧照錦筵小妓宜舞宜清歌海濤
天風雜管弦齊唱銅鞮月欲斜桑田碧海須臾事今
宵不樂奈明何

襄陽樂寄崔上舍兄弟丁巳

春迴大堤上處處遊人多峴山雪欲消漢水生微波
長松列堤映碧海海棠撲路蒸紅霞風淳俗美政粗

成歲登良和無怨嗟郡城家家春酒熟訟庭無人芳
草綠使君於此興不淺太平樓上頻開宴醉來倒着
白接罹風流不減山翁時有時乘興向洛伽臺有義
相亭梨花高張伎樂衆賓喧爛醉直到參橫斜春風
楊柳愛娘舞明月樓臺采雲歌雪浪翻天浦淑白晨
曦盪海波濤赤醉中舉杯酌永郎雲外依依聞笙鶴
竒觀壯遊冠平生自擬逍遙保此樂誰知玉署天書
下行色忽忽踰雪岳浮榮誤人乃如此回首仙區淚
欲落舊遊森森在眼中風塵擾擾襟懷惡憐君兄弟
江海客不意菰蒲產珠璞勝地傭販皆冰玉况君文

采真聯壁當時幾度醉君家此夜相思夢飛越聊將
一曲襄陽樂遠寄千里梨花月

送固城倅趙嶷望世煥戊午

病夫齒欲豁使君髯如雪人間風雨各飽更眼底榮
枯看已熟昔日臺閣今烟瘴依舊使君心似鐵傍人
莫說固城惡猶勝拘囚玉堂客半世蘧篋坐虛名邈
來惡况真難說空對玄都爛熳春獨抱青綾耐寂寞
年年送人作太守窮鬼擲揄歎命薄嶺海豈能死人
哉使君此行差快活樓船伏波與周旋肥肉大酒度
歲月涎饌裹搖脾可扶橘釀辛甘瘴可却梅雨香消

海氣腥春風吹捲黃茅惡極目東南海茫茫碧波亭
畔雲濤黑醉後悲吟吊忠烈丈夫雄心曾激越何如
病臥終南下閉戶噤唸日局縮使君側耳聽我語欣
然如往清涼域臨行更舉一大白握手相看俱墨墨

松岳篇

鵠嶺岩峽鎮蘇岬異氣蜿蜒鬱磅礴天磨飛舞聖居
屹蒼翠北來天一握崧然拔地萬仞強劍戟森森龍
虎攫富媪釀精幾萬劫地靈鍾英事如昨玉龍山人
留秘鉗羅監三昧眼前卓糴田咄嗟移卜築青木葱
蘢蔽岩岬呼砂壓勝古有法從此神山呼松岳龍孫

崛起提三尺手擣三韓血華赤法官突兀山之下燁
燁祥光仍舊宅寶鏡文現操雞鴨坐見竒功成統合
衣冠文物五百載起居飲食與山接幘幪終作大國
望斧斤不似牛山濯地利猶應較方城形勝何遠讓
嵩洛忽忽繁華付一瞥葱葱佳氣輸三角神崧夜呼
寶籙訖王業千秋已索莫蕭蕭暮雨西京路故國興
亡山一髮紫洞烟沉聖骨寒滿月臺空但明月叢巒
無語歛愁碧時有遊人踏清樾

聯句

咏栢 甲午

海松蟠特地黛色勢參天

聚

棄置曾何處移來問幾

年

周

透簾光滴滴落地影妍妍

元

白甲溜新雨蒼髯

罩暮烟

知

葉香經鳳宿根古學龍纏

聚

新甫空山裏

孔明古廟前

元

論姿松作匹較直爾爲先

周

褒節懷

宣聖成仙緬倜傥

聚

寧同百卉落獨貫四時全

元

幾

入騷人咏長爲君子憐

周

聊將晚歲計永與苦心堅

聚

材大宜樑棟當扶廣厦顛

知

題南岳古詩後

憶昔論文廣陵東知君綽有西京風昨蒙延祖
款余門遺編更發青箱中手披口詠不知罷朱

絃一唱音泐泐精金入冶不變輝寶劍脫礪仍
加礪自古東人愛近體相沿謾費雕鏤功長句
聞來輒思臥末力已盡終難工君今特起千載
後欲躡杜韓相爭雄世人鹵莽不肯賞朝評未
真吾欲聾才名齟齬頭易白投紱久作歸田翁
脩文期迫夜臺遙草詔職罷鑿坡空憐君任質
外形骸愛君擇交忘異同鍾期旣亡余亦老此
語欲吐驚兒童且看古來文苑傳議論常於身

後公

任公輔相元稿

